

Sot de trasparence il gnûf comitât tecnic sientific

IL CONSEI DI AMINISTRAZION de Agenzie regionâl pe lenghe furlane, vie pe sentade dai 3 di Març, e à nomenât ae unanimitât il Comitât tecnic sientific. I components a son Donato Toffoli e Piera Rizzolatti, esperts di planificazion linguistiche; Alessandra Burelli e Pierino Donada, esperts di didatiche par furlan; William Cisilino e Luca Peresson, esperts sul ûs dal furlan tai mass media; Maria Carminati, esperte te produzion artistiche, musicâl e multimediâl. Nons gnûfs, ma ancje cualchi conferme. Il comitât dal mandât precedent (cun Lorenzo Fabbro, president de agenzie) al jere fat di Alessandra Burelli, Paolo Cantarutti, Giuseppe Mariuz, Silvana Schiavi Fachin, Ferruccio Tassin, Donato Toffoli e Federico Vicario.

«Al è un grup di grande cualitât, che al podarà lavorâ une vore ben, fat di int serie, che e à proposits positîfs», al dîs il president de Arlef, Lorenzo Zanon, che al marche il criteri di trasparence doprât, premesse ae costituzion dal comitât e metût dentri ancje te delibare de nomine. «No vœi incompatibilitâts de bande dai components rispjet ai progjets che si laran a atuâ», tant che «chei che a àn rûls particolârs, a 'nd è un pâr, a clariran la lôr posizion, dimetintsi». Zanon al fâs l'esempli di Luca Peresson, president dal Cfl2000. «Al à di dimetisi de cariche subite e rispjet al futûr no à di impegnâsi plui diretamenti te gjestion dai progjets che a varan a ce fâ cul consorzi. Chest al vâl par ducj».

Cumò il comitât «al à di lavorâ». Si à di «imagjinâ un senari par chel che al rivuarde la politiche linguistiche sul furlan, che, prime di dut, al à di individuâ chei trê, cuatri ponts fundamentâi, ancje a tiermin lunc, che nus àn di vuidâ. O vin di fâ des sieltis di fonde – al zonte Zanon –, dentri di chestis si sviluparan iniziativis e progjets par razunzi i obietîfs».

Sodisfat par vê fat lis nominis in curt – «no cemût che al è sucedût a mi, che o ai spietât trê mès il decret di nomine» –, «o scomençarin daurman a dâsi dongje e a lavorâ». Ciert, cumò al è di spietâ la sentence de Cort Costituzionâl su la legjitimitât costituzionâl dai ponts de gnove leç regionâl su la lenghe furlane (29/2007) che a son stâts impugnâts dal Guvier talian. «Chest passaç al è impuartanton par nô – al marche il president de Arlef –. De direzion regionâl Istruzion e culture mi àn dât des sigurazions, tal sens che no varessin di jessi grancj salvaments. L'air al è avonde positîf, mi preocupin i timps. Sperin che la sentence e rivi in curt».

ERIKA ADAMI